

QUÆSTIO MEDICA.

CARDINALITIIS DISPUTATIONIBUS

manè discutienda in Scholis Medicorum, die Jovis

decimâ septimâ Martii 1707.

M. JOANNE-FRANCISCO FOY-VAILLANT,

Doctore Medico, è Regiâ Inscriptionum &

Numismatum Academiâ, Præside.

An statim ab assumpto Cathartico somnus ?

I.

AUXILIA Medicinæ præsentiora, quibus tollit morbos, arcet mortes, Phlebotomia, Catharsis: ut agant tutius, opportunè tantùm præbenda. Sic rarò purgandum in acutis. Habenda ratio loci, temporis, ætatis, & morbi, in quibus convenit aut non. Indulgendum consuetudini. Sunt quibus simul aut bis, & quibus plus aut minùs, & particulatim oporteat offerre. Antecedentia, consequentia, attendendi locus non infimus. Corpora, ubi quis purgare voluerit, facilitè fluentia facere oportet; hanc lubricitatem conciliabit enema non solùm, pariet etiam somnus: *ὁ δὲ τὸ ὕπνῳ τὸ ὕγιον.* Hinc manè propinandorum Cathartico-
rum mos, nunquam nisi infummis casibus violandus; Verùm quæ antrorsùm ducebant, eadem sæpiùs à tergo periculosa. Hujus est ordinis somnus à medicamentorum potione, qui scilicet eorum minuit vires, ipsorum obest effectibus, in gravissimas angustias ægrum aliquandò reducit.

II.

REMEDIA, quotquot Ars aut adhibet aut adhibenda proponit, in sanitatis revocationem, exilium morbi tendunt. Dolores inter assiduos interdùm novos infligit, at temporaneos quibus infixi eripiuntur. Vires prostrare videtur venæ sectio, quæ alacriores indè resurgunt;

vacuare penitus purgatio, ex quâ potiores repletiones evadunt. Ne metuant ergò Medici suâ sapè, ægrorum sapiùs timiditate ducti impura fatigare corpora, donec virus omne, accrescens in dies quando sinunt, deposuerint. Caveant ne blandiendo nimis ægrotantibus labem adaugeant, dedecus sibiprocreent. Fastidiis vix superabilibus consulant, amarorem Aloës exempli gratiâ minuendo, insipidam ac penè nauseosam acuendo Cassiæ dulcedinem, modò efficacia eorumdem intacta remaneat. Gustui quantum licet fiat satis, & simul intentus finis obtineatur. Gratulabitur æger Medico, ægro Medicus: erit utrinque gaudium. Quæ verò scopo nocitura sunt, quantumvis exoptata valdè & experita mali tanquam ominis avertantur: ad scopum enim referenda indefinenter media, ipsum ut attingant.

III.

SOMNUS imago lethi, visceribus attamen *ἀπὸ τοῦ* *ἀναφυγόντος* in homine cum vigiliâ divisum habet imperium. Cessatio sensuum tum externorum tum principis rectè definitur. Ubi animo & corpori otiaudum, neque lædit somnus neque culpandus est. Tunc namque temporis unica operatur functio vaga & exlex, vis imaginatrix nempe somniorum parens, ad temperamenti cognitionem nihil ferè conducentium. Et certè duces adsunt inordinati spiritus, qui confusè admodum totam ventris supremi regionem pervadunt, huc illuc excurrunt, frequentius contritos antea tramites relegunt, pro consuetâ inter-vigilandum impulsione majori minorive ad partes quasdam turmatim remeant, quas ob levem fibrarum orbiculatarum resistantiam facillimè commovent; hinc nocturnæ pollutiones in Venereis mortalibus, quorum humido genitali turgent vesiculæ seminales; hinc in pueris, quorum alvus scatet coluvie nimiâ, & lubrica jam est, inter-domiendum egestiones involuntariæ: malum sanè, somni ab assumpto cathar-

tico comes, non autem unicum; namque, etsi ceu irritamentum impuris humoribus exitum suldeve quærentibus ministretur, eget tamen adhuc insito nobis adjumento (spiritibus) quod si non omninò, saltem ex parte somnus adimit. Quid indè? diversi proveniunt effectus, iique pessimi; quin ægri, nedum levatio contingat, res longè sit angustior.

IV.

CATHARSIS duplex: una per superiora, vomitio audit: altera per inferiora, purgatio simpliciter dicitur. Hæc hyemem ac melancholicos, illa pituitosos potius æstatemque spectat. Quæ ducere autem oportet, quò maxime vergunt eò ducenda. In utroque casu agitur ferè semper de viarum primarum munditiæ, humanæ enim machinæ Camarina præcipuè ventriculus. Ejus musculosam membranam ferunt & vellicant medicamenti purgantis salia, ut nidulantes in glandulosâ succos heterogeneos excutiat; ast metus incurrere debet haud mediocris ne irritatio fiat major, dum spiritus contra nitentes absunt, neve phlogoses aut exulcerationes consequantur. Cerebri autem interdormiendum spiritus plerique sunt hospites, hypogastrii pauci. Aliundè quæ Cathartici particulæ chyli & sanguinis vehiculo artus omnes subeunt, sordes ex illis eliminaturæ, rectore spiritu orbatæ recrementa quædam secum inducent, complures halitus tetros ad sacram Palladis arcem efferent, quæ non movenda movebunt, non movebunt quæ movenda; & erit novissimus error pejor priori. Quæ scilicet hærebant velut in limine, privatos intra parietes retrahentur, undè profectò avulsio eò difficilior, quò robur suppetit imbecillius. Reverâ somnus reficit, vires instaurat, sed non præse fert; dat, sed non habet. Prætereà quonam in statu expergiscit ægrotaans, qui sumptâ porione dormitavit! Anxietates, dolores capitis, vertigines, cardialgiæ, tormina malæ mercis sunt fructus

peffimi. Qui dubitant, meminerint nobilis illius fœminæ à biennio defunctæ, cui variolarum initio præscriptum emeticum, somnus exinde concessus; quàm cito, quàm miserè pœnas erroris perfolvit!

V.

HIPPOCRATES, cui in medendi peritiâ prima laus, seu olim valentiora corpora, seu ignotæ mitiores, alias à nostris imperabat *φαρμακείας*: apprimè tamen analogiâ servatâ methodus eadem retinebitur. Cùm quis bibisset veratrum, ad motus quidem corporis magis ducebat summus ille Vir, ad somnos verò quietemque minùs. Si nihilominùs hellebori vis esset acrior, statutum invertibat ordinem, corpus non movebat ampliùs, somnum faciebat seu hypnoticas exhibendo potiones, seu quovis alio modo: imminutæ somni operâ catharticorum actionis illustre argumentum! Nos, quibus in promptu sunt generis utriusque medicamina, ut vehementia ità & blandiora, relictâ cautione adjunctis duntaxat accomodatâ, ubi purgare fortiter voluerimus, Sennâ, Jalappâ; Scammonio, Stibio utamur; ubi segniùs, Tamarindi, Manna, Cassia leviora cathartica nobis offerent. Ab alterutro sumpto prudens sex rerum non naturalium adhibeatur usus. Quies servetur amica, lectose componat æger mediâ saltem diei parte, ne unâ quidem ejus particulâ aëri nudo sese committat, animi pathemata exulent, alimentorum nulla fiat ingurgitatio, quæ purgationis opus interturbaret: præcavendi etenim quicunque evacuationi salutiferæ obices;

Non ergò statim ab assumpto Cathartico somnus.

Proponebat Parisiis FRANCISCUS OLIVARIUS DE CUVILLE,
Parifinus, Baccalaureus Medicus. A. R. S. H. 1707.